

दिनांक 28.11.2025

समय: 18.45 बजे

- प्रधानमंत्री नरेंद्र मोदी देश ने खुद रे पाण ऊबो करण सारु नौ संकल्प दीनां
- जल जीवन मिशन रा तैत देश रा गांवाई हलकां मांय 15 करोड़ घरां ताई नळ रे जरिये पाणी पूगायी ज्यो
- एसआईआर रा तैत गणना प्रपत्रां रा डिजिटाइजेशन पाछे मैपिंग मांय ई राजस्थान देश मांय अव्वल
- प्रदेश मांय चाल रह्या खेलो इंडिया यूनिवर्सिटी गेम्स मांय कर्नाटक री जैन यूनिवर्सिटी अव्वल

000

प्रधानमंत्री नरेंद्र मोदी देश ने खुद रे पाण ऊबो करण सारु नौ संकल्प दीना हैं कर्नाटक रा उडुपी रा श्री कृष्ण मठ मांय लक्ष कंठ गीता पारायण कार्यक्रम मांय श्री मोदी जनता ऊँ कुदरती खेती ने बधावो देवण, बाजरो काम ले र स्वस्थ जीवन शैली अपनावण, तेल कम काम लेवण अर योग ने ज़िंदगी रो हिस्सा बणावण री अपील कीनीं

प्रधानमंत्री आज ज्यां नौ प्रस्तावां रो ज़िक्र कीनो, वां मांय जूनी पांडुलिपियां ने हेर र राखणो ई शामिल हैं वे कह्यो के म्हाणो जूनो ज्ञान आवती पीढ़ी ने दियो जावणो चाहिजें श्री मोदी जनता ऊँ विरासत अर रीति-रिवाज़ सारु पिछाणी जावण वाळी 25 ठौड़ों री सैर करण री अपील ई कीनीं

000

देश रा गांवाई हलकां मांय जल जीवन मिशन रा तैत 15 करोड़ घरां ताई नळ रे जरिये पाणी पूगा दियो ज्यो हैं जल शक्ति मंत्री सी.आर. पाटिल आज नई दिल्ली मांय सुजलम भारत सम्मेलन सारु विज्ञान मांय आ जाणकारी दीनीं वे देश रा हर रहवासी सारु लगातार पाणी मुहैया करावणो तैय करण रो सरकार रो इरादो ओजू बतायों पाटिल कह्यो के ओ सम्मेलन पाणी बचावण बाबत् वैज्ञानिक अर लगातार तरीका बणावण सारु आखा देश मांय चलायी जा रही मुहिम रो हिस्सो हैं

जलशक्ति मंत्री कह्यो के मनरेगा फंड रो 65 फीसदी हिस्सो पाणी री घणी कमी वाळा हलकां ने दियो जावेला, ताकि ज़मीं हेटे पाणी रो लेवल ओजू ऊँचो लायो जा सकें ई मौके वे जल संचयन जन भागीदारी 1.0 पोथी रो विमोचन ई कीनीं

000

मुख्यमंत्री भजनलाल शर्मा कह्यो है के राजस्थान निवेश सारु सब ऊँ चोखी ठौड़ है अर निवेश बाबत् जरूरी सगळी चीजां अटे मिले हैं वे आज नई दिल्ली मांय राख्यी ज्या कारोबारी संगठन फिक्की रा सालाना सम्मेलन मांय बोल रह्या हां श्री शर्मा कह्यो के राज्य सरकार उद्योगपतियां अर प्रवासी राजस्थानियां री मदद सारु तैयार हैं मुख्यमंत्री उद्योगपतियां ने राजस्थान मांय निवेश करण रो न्यौतो दीनीं

मुख्यमंत्री कह्यो के देश सागे राजस्थान ने ई साल 2047 ताई विकसित प्रदेश बणावणो तैय करी ज्यो है, जिण मांय राज्य रा प्रवासियां अर उद्योगपतियां रो मोटा काम व्हेलां

000

राज्य सरकार प्रदेश मांय ढांढा-ढोरां रा 310 अस्पतालां रा नुवा भवन बणावण सारु 144 करोड़ रुपया ऊँ बत्ती रकम मंजूर कीनी हैं पशुपालन मंत्री जोराराम कुमावत आ जाणकारी दीनीं वे बतायो के ग्रामीण विकास निधि रा तैत 31 मार्च-2029 ताई अ भवन बणावणो तैय करी ज्यो हैं कुमावत बतायो के जयपुर रा 26, भीलवाड़ा, पाली अर नागौर रा 18-18, झुंझुनू रा 17, जोधपुर रा 16 अर दूजा जिलां मांय ज़रूरत रे मुजब पशु चिकित्सालय भवन बणाया जावेलां ई बाबत् हुकम जारी व्हेवण सागे ई हर पशु चिकित्सालय सारु साढे 46 लाख रुपया मंजूर करी ज्या हैं

000

वोटर लिस्टां रा विशेष गहन पुनरीक्षण-एस आई आर रा तैत वां रा डिजिटाइजेशन पाछे मैपिंग मांय ई राजस्थान देश मांय अव्वल बण ग्यो हैं प्रदेश मांय वोट देवण रा पात्र लोग मांय ऊँ हाल ताई 78

फीसदी रो मिलान जूनी वोटर लिस्टां ऊँ व्हे ग्यो हैं आ मतदातावां ने अब किणी भांत रा कागजात पेश करण री जरूरत नी हैं मुख्य निर्वाचन अधिकारी नवीन महाजन आ जाणकारी दीनीं वे बतायो के प्रदेश रा नौ हजार ऊँ बत्ता मतदान केन्द्रां माथे बूथ लेवल अहलकार सौ फीसदी काम पूरो कर लीनो हैं महाजन बतायो के टेमसर काम पूरो करण वाळा करबी अढ़ाई हजार बीएलओ रो मान करी ज्यो हैं श्री महाजन कह्यो के मैपिंग ने बधा र 85 फीसदी रा लेवल ताई पूगावणो तैय करी ज्यो हैं ई बीचे एस आई आर रा दूजा दौर रा तैत 50 करोड़ 68 लाख ऊँ बत्ता गणना प्रपत्र बांट दिया ज्यो है, जो ई दौर मांय शामिल वोट देवण रा पात्र करीब 51 करोड़ लोगां री तादाद रो 99 दशमलव चार-तीन फीसदी हैं एस.आई.आर रा दूजा दौर रा तैत 4 नवंबर ऊँ चार दिसम्बर बीचे राजस्थान, छत्तीसगढ़, गोवा, गुजरात, केरल, मध्यप्रदेश, तमिलनाडु, उत्तर-प्रदेश, पश्चिम बंगाल, पुद्दुचेरी, लक्षद्वीप, अंडमान अर निकोबार द्वीप समूह मांय खास अभियान चलायी ज्यो हैं पुनरीक्षण रो काम आवता साल 7 फरवरी ने वोटर लिस्टां री छपाई सागे पूरो व्हेलां

000

जैसलमेर ऊँ काल नुवी रेल “जैसलमेर एक्सप्रेस” चलायी जावेलां रेल मंत्री अश्विनी वैष्णव अर केंद्रीय संस्कृति अर पर्यटन मंत्री गजेन्द्र सिंह शेखावत रो इण ने हरी झंडी बता र रवाना करण रो कार्यक्रम हैं जैसलमेर ऊँ दिल्ली रा शकूरबस्ती स्टेशन बीचे चलायी जावण वाळी 16 डिब्बां री आ गाड़ी काल संवारे ग्यारह बज र बीस मिनट परां जैसलमेर ऊँ रवाना व्हे र आवता दिन तड़के साढे चार बज्यां शकूरबस्ती पूगेलां

000

प्रदेश मांय गिव अप अभियान रा तैत हाल ताई 48 लाख अपात्र लोग मर्जी ऊँ खाद्य सुरक्षा सूची ऊँ नाम कटवा लीना हैं ई सागे ई सवा 70 लाख ऊँ बत्ता वंचित पात्र लोगां ने खाद्य सुरक्षा योजना ऊँ जोड़ी ज्यो हैं खाद्य अर नागरिक आपूर्ति मंत्री सुमित गोदारा आ जाणकारी दीनीं वे बतायो के 31 दिसंबर ने ओ अभियान खत्म व्हेवण ताई ई जो अपात्र लोग नाम नी हटवावेला वां रे खिलाफ नियम रे मुजब कार्यवाही कर र वसूली करी जावेलां

000

सिरोही जिला रा पिंडवाड़ा ब्लॉक मांय समावेशी आजीविका योजना रा तैत मिली प्रथम सहायता राशि ऊँ आदिवासी महिलावां काम-धंधा सुरू कीना हैं राजीविका री ओर ऊँ चलायी जा रही ई योजना ऊँ महिलावां खुद रा काम-धंधा कर र पिरवार री जिम्मेदारियां ई निभा रही हैं

000

प्रधानमंत्री नरेन्द्र मोदी 30 नवम्बर दीतवार ने आकाशवाणी ऊँ प्रसारित कर्या जावण वाळा खास कार्यक्रम “मन की बात” मांय विचार बतावेलां आ हर महीना प्रसारित कर्या जावण वाळा ई कार्यक्रम री 128वीं कड़ी व्हेलां ओ कार्यक्रम आकाशवाणी अर दूरदर्शन रा पूरा नेटवर्क माथे, आकाशवाणी समाचार री वेबसाइट अर न्यूज़ ऑन एआईआर मोबाइल ऐप माथे प्रसारित कर्यो जावेलां ई सागे ई आकाशवाणी समाचार, डीडी न्यूज़, प्रधानमंत्री रा दफ्तर अर सूचना अर प्रसारण मंत्रालय रा यूट्यूब चैनलां माथे ई ओ कार्यक्रम प्रसारित कर्यो जावेलां

000

राज्य मांय दलहन अर तिलहन री सरकारी मोल माथे खरीदी सुरू व्हे गयी हैं नाम मंडायाड़ा किसान मूंगफली, उड़द, मूंग अर सोयाबीन री साखां री खरीद केन्द्रां माथे तुलाई करा र बेच सके हैं भीलवाड़ा जिला मांय ई सारू 27 केन्द्र बणायी ज्यो हैं

000

विश्वविद्यालय अनुदान आयोग-यूजीसी कॉलेज-विश्वविद्यालयां ऊँ टेमसर इम्तिहान करावण अर उपाधियां अर सर्टिफिकेट बेगा देवण रा हुकम दीना हैं आयोग रे मुजब ई काम मांय मोड़ो व्हेवण ऊँ विद्यार्थियां ने मौका कम मिले है अर वां ने नौकरी-धंधा रा बेहतर मौका मिलण मांय अड़चन आवे हैं आयोग कह्यो नतीजा रा ऐलाण री तारीख ऊँ 180 दिन री मियाद मांय डिग्री दे दी जावणी चाहिजें

0000

56 वों भारतीय अंतर्राष्ट्रीय फिल्म महोत्सव-इप्फी 2025 आज पूरो व्हे रह्यो हैं 20 नवम्बर ऊँ चाल रह्यो ई महोत्सव मांय 81 देशां री 240 ऊँ बत्ती फिल्मां बतायी ज्यीं महोत्सव रे दौरान फिल्मां रा दरसाव सागे ज्ञान बधावण वाळी फिल्मां बणावण वाळां अर हीरो-हीरोइन सागे बातचीत रा खास सत्र ई राख्यी ज्यो

0000

सूचना अर प्रसारण मंत्रालय रा क्षेत्रीय प्रचार केन्द्र री ओर ऊँ राजसमंद मांय लगायी ज्यी तीन दिन री प्रदर्शनी आज पूरी व्हे गयीं समापन जळसा मांय खास पावणी विधायक दीप्ति माहेश्वरी कह्यो के विकसित भारत रो सपनो सांचो करण सारु सरकार महिलावां नौजवानां, किसानां अर गरीब तबका री जनता ने मजबूत बणावण बाबत् केई जतन कीना हैं वे कह्यो के ई काम मांय जनता सागे सरकारी अहलकारां अर जनता रा नुमाइन्दा ने ई सकारात्मक भागीदारी करणी व्हेलां प्रदर्शनी रे दौरान राख्यी ज्यी भांत—भांत री होड़ां जीतण वाळां ने ई ईनाम दे र नवाजी ज्यां

000

राज्य मांय चाल रह्या खेलो इंडिया यूनिवर्सिटी गेम्स मांय कर्नाटक री जैन यूनिवर्सिटी अव्वल बण्योड़ी हैं ई बीचे लवली प्रोफेशनल यूनिवर्सिटी सोना रा 21 तमगां सागे 40 तमगां जीत र दूजी ठौड़ माथे आ गयी हैं अमृतसर री गुरुनानक देव यूनिवर्सिटी सोना रा 20 तमगां समेत कुल 37 तमगा जीत र तीजी अर चंडीगढ यूनिवर्सिटी 22 तमगां सागे चौथी ठौड़ माथे हैं

000

जयपुर रा मौसम विज्ञान केंद्र मांय आज भारत अंतर्राष्ट्रीय विज्ञान महोत्सव रो कर्टन रेजर कार्यक्रम राख्यी ज्यों केंद्र रा निदेशक राधेश्याम शर्मा बतायो के विज्ञान महोत्सव ऊँ विद्यार्थियां ने वैज्ञानिक नजरियो विकसित करण सारु मंच मिलेलां

000